

INKULUMO YESABELOMALI SIKA 2019/20

IVOTI 6: IHHOVISI LIKAMGCINIMAFI



UMHLONISHWA, UMNUZ. RAVIGASEN RANGANATHAN PILLAY, MPL
UMPHATHISWA WEZEZIMALI

Inkulumo yesabelomali eyethulwa uMnuz. R.R. Pillay, MPL UMphathiswa wezeziMali

Ngesikhathi kwethulwa iSabelomali seVoti 6 esiShayamthetho sesiFundazwe

25 kuNtulikazi 2019

Somlomo oHloniphekile

Malungu aHloniphekile

INhloko yeHhovisi likaMgcinimafa nabaSebenzi abaNkomo

AbaHoli kwezamaBhizinisi, kwezeMfundo, kwezeNkolo naseMphakathini

Abamaziko eziNdaba

BaFowethu noDadewethu

BoZakwethu nabaNgani

1. ISINGENISO

Kuyintokozo kimina ukwethula iSabelomali sika 2019/20 seHhovisi likaMgcinimafa wesiFundazwe esingu R721 629 million. Somlomo, emasontweni amabili adlule, bengimi lapha ngesikhathi ngivuselela uMthethosivivinywa woKwabiwa kweziMali ka 2019/20. Kuleyo nkulomo ngaveza isithombe mayelana nezimo ezinzima zomnotho esibhekene nazo ngaphinde ngethula ezinye izinhlelo iHhovisi likaMgcinimafa elizoziqala kulo hulumeni wehlandla lesithupha. Ngizokwenaba ngalezi zinto ngokuhamba kwesikhathi.

Malungu ahloniphekile, ubunzima esibhekene nabo kwezomnotho kusho ukuthi isabelomali esinaso kasenele ukufezekisa, kanye kanye, izinto eziningi esimelwe wukuzenza. Ngakho-ke, lokhu kusiphosela inselelo njengeHhovisi likaMgcinimafa lesiFundazwe ukuba siqaphele uma senza umsebenzi wethu njengabaqaphi besikhwama semali yomphakathi. Kuphinde kusho ukuthi kumele sibe nombono futhi siqhamuke namasu amasha ngendlela esisebenzisa ngayo izinsiza zethu ezingatheni.

UMengameli wokuqala waseGhana, uKwame Nkrumah uyibeka ngokucacile lapho ethi ***“Bantu bakithi, umsebenzi esibhekene nawo mkhulu, ijoka lawo liyasinda, kodwa uyinselelo enhle nethokozisayo – inselelo emema ukuba sibe nokuzimisela, sibe***

namaphupho, sikholwe, futhi sisukume sizame, sibe nombono, sizimisele ukulwa, sizimisele ukusebenza, sizimisele ukuphumelela – ukufeza izinto ezinkulu ezinhle siveze namandla esidalwa esingumuntu”.

Asikwazi ukusonga izandla singenzi lutho bese sihlale sikhala ngalezi zinkinga. Kumele sishintshe imiqondo yethu siyeke ukuhlale sicabanga ngalokho esinakho nesingenakho kodwa kumele sigxile ekutheni sikusebenzisa kanjani lokho esinakho. Sifuna ukuqinisekisa ukuthi irandi ngalinye lenza umsebenzi obonakalayo futhi siqinisekise ukuthi siyaveza ukuthi irandi nerandi lenzeni. Lokhu kuzoba ngenye yezinto esizogxila kuzo eHhovisi likaMgcinimafa kulo nyaka wezimali. Singakwenza lokhu uma siqeda ukumoseka kwezimali, silwa nenkohlakalo futhi senza ngcono ukuphatha eminyangweni yethu yonke, komasipala nasemabhizinisini kahulumeni. Lokhu-ke kuzobe sekuqinisekisa ukuthi sithola okuyifanele imali emisebenzini esihlinzekwa ngayo nempahla esiyithengayo. Ukuze sifeze lokhu sidinga ukuzibophezela nokusebenzisana neminyango kanye nomasipala. Angingabazi ukuthi sizosebenzisana.

Njengoba sasho ngesikhathi sethula isabelomali sesifundazwe, ijoka lethu njengeHhovisi likaMgcinimafa esiFundazweni akumele nje kube ukugcina amabhuku ezimali kuphela. Lo mnyango siphinde siwubuke njengomunye webalulekile emizamweni yethu yokwakha isizwe esithuthukayo njengoba kuhlangoziwe oHlelweni lweNtuthuko lukaZwelonke (National Development Plan). Lokhu sizokwenza ngezinhlelo zethu sigxile ekwesekweni kwezihlelo zengqalasizinda, ukuphathwa kwezimali, ukwenziwa kophenyo, nokuphathwa kwezimali zomasipala.

IManifesto ye-ANC iphinde isiyalele ukuba njengohulumeni “senze okungaphezulu ukubhekana neqhaza lomkhakha wezezimali ekuthuthukiseni isizwe, okubandakanya izinkinga zokuthola uxhaso lwezimali zokuqala amabhizinisi amancane, izindlu, amabhini enalokishini nasemakhaya nakwezengqalasizinda.” Nakuba lona kungumsebenzi obhekene ikhakhulazi nohulumeni kazwelonke, lokhu akusivimbi ukuba senze okungangamandla ethu nathi kulo mbono.

UMnyango usiphumelele ukuqala uhlelo olusha ne-Absa, oselubekele uR70 million obolekisayo ozoxhasa isiKhwama samaBhizinisi eNtsha nomunye uR500 million obolekisayo ozoxhasa amabhizinisi amancane nemifelandawonye esebenzisana nohulumeni wesifundazwe. Kuningi esingakufeza uma siba nobambiswano phakathi kukahulumeni, amabhizinisi, abasebenzi, umphakathi ngobubanzi nobuholi bomdabu. Sizozama ukukhuthala ukuthola lolu bambiswano. Sizozama ezinye izikhungo zezimali

ukuba zisijoyine zibambisane nohulumeni ukubhekana nezinye zalezi zinselelo esibhekene nazo njengezwe.

Angicizelele, maLungu aHloniphekile, ukuthi uma sikhuluma ngokubambisana nezinhlaka zomphakathi akukhathaleki ukuthi ungakuluphi uhlangothi kwezepolitiki. Konke kudinga ukuzibophezela kwethu sonke ukuze sibambe iqhaza ekukhuliseni isizwe. Sikugcizelela kakhulu ukwakha ubambiswano nezinhlaka zomphakathi. Kungumsebenzi wethu ukuba sifuqe ukwakhiwa kwalobu budlelwane. Njengabantu bezwe elilodwa, kumele sibumbane.

Umbhali oyingcithabuchopho wencwadi eyadayisa kakhulu esihloko sithi 'Things Fall Apart', uChinua Achebe, uloba kanje encwadini yakhe: ***“Indoda emema omakhelwane bayo esidlweni esikhulu ayikwenzi lokho ngoba ifuna ukubephula endlaleni. Labo bantu banakho ukudla emizini yabo. Uma sihlangana ndawonye egcekeni lesigodi sethu ngokuphuma kwenyanga lokho asikwenzi ngoba sifuna ukubona inyanga. Wonke umuntu angayibona inyanga noma ngabe ekwakhe. Sihlangana ndawonye ngoba kuyinto enhle omakhelwane okumele bayenze.”***

Ukumelana kwethu nezimo njengabantu yikhona okusenza sibe namandla. Ngakho-ke sizoqinisekisa ukuthi iHhovisi likaMgcinimafa esiFundazweni nalo lenziwa ukuba likwazi ukumelana nezimo.

Ngokuholwa wuMthetho wokuPhathwa kweziMali zoMphakathi (Public Finance Management Act) noMthetho wokuPhathwa kweziMali zoMasipala (Municipal Finance Management Act), iHhovisi likaMgcinimafa lizoqhubeka nokulwela ukuba *“Yinsika yokuqinisekisa ukuphathwa kahle kwezimali nokulawulwa kwesikhwama sezimali ezweni lonke.”*

Lesi sabelomali engisethulayo sizoba yisisekelo sohlelo lwethu lokuhlinzeka uzinzo kwezezimali, ukwakha uhulumeni onekhono futhi othuthukayo nokuhlinzeka izinguquko ezibalulekile.

1.1 UKUZIBOPHEZELA KWEHHOVISI LIKAMGCINIMAFU WESIFUNDAZWE

Onyakeni wezimali ka 2019/20 sizoqala ngokugxula kulokhu okulandelayo:

- Izinhlelo zokulawula zangaphakathi ezicacile zokubhekana nezindaba zangaphakathi emiNyangweni, koMasipala nasemaBhizinisini kaHulumeni

ngesikhathi kuqhutshekwa nokuqinisekisa ukuthi kuba nomkhankaso wesikhathi eside wokuphucula ukucwaningwa kwamabhuku nempumelelo;

- Ukuthatha amagxathu afanele ukulwa nenkohlakalo nokukhwabanisa kuhulumeni;
- Ukuqinisekisa ukuthi izinhlelo zokukhishwa kwamathenda zibekwa obala futhi azenzeleli. Ukugxila ekukhuthazeni uHlelo lokuThuthukiswa kwabaMnyama kwezoMnotho (B-BBEE) ngezinqubomgomo ezisebenzayo zokukhishwa kwamthenda;
- Ukuqinisekisa ukuthi imali isetshenziswa yonke njengokwabiwa kwayo (yiminyango) kulandelwa uhlelo lokulawula nokuqapha ukusebenza kwezimali kwaphakathi nonyaka;
- Ukuqhubeka nokugcina isifundazwe sisesimweni esihle sezimali;
- Ukukhuthaza ukulekelelwa komasipala namabhizinisi kahulumeni ukuze kuphathwe kahle izimali; kanye
- Nokuhlinzeka olunye usizo eminyangweni, emabhizinisini kahulumeni nakomasipala ukuze kuqhutshwe amaprojekthi engqalasizinda amileyo.

Izinjongo zethu ukuqhakambisa isidingo sokuba iHhovisi likaMgcinimafa wesifundazwe libe nobudlelwane obuqinile nabo bonke abaPhathiswa, iminyango yabo kanye namabhizinisi kahulumeni. Ngokusebenzisana noNdunankulu kanye noMnyango wezokuBusa ngokuBambisana, iHhovisi likaMgcinimafa esiFundazweni lizokwakha ubudlelwano obuqinile nabo bonke omasipala. Lobu budlelwano kumele kwakhiwe phezulu kwesisekelo sokwethembana nokwesekana. Sonke siyadinga ukusebenza njengophathina ekukhuthazeni ukubusa okuhle nokuhlinzekwa kwezidingo okwamukelekayo.

2. ISITHOMBE NGENGENISOMALI, UXHASOMALI NEMALI ESEBENZISWAYO OHLELWENI NGALUNYE

Njengamanje ngizokhuluma ngqo ngohlelo lweHhovisi likaMgcinimafa lokuqoqa izimali, uxhasomali elitholwa umnyango kanjalo nokulandela izinjongo zokuhlinzeka izidingo nokuxhaswa kohlelo ngalunye lweHhovisi likaMgcinimafa esiFundazweni onyakeni ozoqala. Imininingwane egcwele iqukethwe kusomqulu *iVote 6 Estimates of the Provincial Revenue and Expenditure (EPRE)* kanjalo nasoHlelweni lokuSebenza loNyaka lomnyango.

Isabelomali somnyango sesisonke senyuke ngoR70.7 million sisuka kuR650.9 million saya kuR721.6 million. Lokhu kwenyuka kuka10.8% kudalwe ikakhulukazi wukwenyuka kwezimali zokuxhasa uphiko locwaningo lwangaphakathi kanjalo nokuxhaswa kokungenelela ohlelweni lokukhishwa kwamathenda eMnyangweni wezeMpilo.

2.1 INGENISOMALI

**Imali eqoqwe wumnyango – R365.842 million
(isuka kuR296.056 million ngo 2018/19) okungukwenyuka kuka 23.5%**

Imali eningi yeHhovisi likaMgcinimafa wesiFundazwe njengamanje yinzalo yemali ekwi-akhawunti yasebhangwe yesifundazwe. Le mali ivela ikakhulukazi kwinzalo yemali yesiKhwama seNgenisomali sesiFundazwe kumabhalansi e-akhawunti eDidiyela iziMali eziSetshenziswa emiNyangweni kaHulumeni eHlukene (Intergovernmental Cash Co-ordinating account) ekwiBhangengodla. Ukuze kutholakale inzalo enkulu, ukukhishwa kwezimali kule akhawunti kwenzeka kuphela uma kudingeke imali. Ukwenza kangcono kulokhu kuqoqwa kwezimali kulo mkhakha kule minyaka edlule yakamuva nje kungenxa yokubambisana ekuqaliseni izinhlelo ze-cash blocking nokunciphisa izindleko kweminyango kahulumeni wesifundazwe.

2.2 UXHASOMALI

Uxhasomali lweGlobal Fund nguR61.994 million onyakeni ka 2019/20

Uxhasomali lweGlobal Fund lokulwa neNgculaza, isiFo soFuba noMalaleveva wuhlelo lokuxhasa ngezimali olusungulwe ngo 2002 ukwandisa izinsiza ezabelwe ukulwa nalezi zifo ezintathu okuyiSandulela-ngculaza neNgculaza uqobo, iSifo soFuba noMalaleveva. Le nhlangano izinze eGeneva, eSwitzerland, kanti ayizenzeli yona lolu hlelo kodwa, esikhundleni salokho, ixhasa ngezimali izinhlelo kulawo mazwe emukela uxhaso kusetshenziswa ubambiswano phakathi kukahulumeni namabhizinisi azimele okuwuhlelo lokuDidiyelwa yiZwe, oweMukela uXhaso, nabancane abeMukela uXhaso.

I-Global Fund igunyaze isicelo soxhasomali seNingizimu Afrika sohlelo lwe-HIV/Aids ngaphansi kohlelo olusha lokuxhaswa. IHhovisi loMgcinimafa esiFundazweni lemukele lolu xhasomali KwaZulu-Natal. Uxhasomali luphele ngoNdasa 2019. IGlobal Fund igunyazwe uxhaso lukaR61.994 million ukuqinisekisa ukuphothulwa

ngendlela efanele kwawo wonke amaprojekthi. Isamba esikhulu sesabelomali sokuphothula amaprojekthi (uR48 million) ngesemali engukheshi neyohlelo lokunakekela.

Lolu hlelo luhlose ukuhlinzeka ngesibonelelo emantombazaneni nakwabesifazane njengengxenye yohlelo lokuvikela iSandulelangculaza neNgculaza ukuze bahlale bengenaso isandulela-ngculaza kanti nalabo asebehaqekile bakwazi ukuthola ukwelashwa. Isibonelelo sitholakala uma sewuke wethamela isigcawu sokwelulekwa. Kukhona nesamba sikaR10 000 esitholwa ngowesifazane ukuze aziqalele ibhizinisi lakhe elincane.

3. IMALI EZISETSHENZISWA OHLELWENI NGALUNYE

3.1 UHLELO 1: EZABASEBENZI – R220.209 MILLION (ISUKA KU R192.377 MILLION NGO 2018/19)

Ukwenyuka ngo 14% kwisabelomali kubangelwe kakhulu wuhlelo oluthile lokungenelela kweHhovisi loMgcinimafa ohlelweni lokukhishwa kwamathenda loMnyango wezeMpilo. NgoMbaso 2017, uMkhandlu oPhethe KwaZulu-Natal wanquma ukuba iHhovisi likaMgcinimafa lingenelele ngokweSigaba 18(2) (g) eMnyangweni wezeMpilo KwaZulu-Natal. Lolu ngenelelo lwenziwa ngaphansi kohlelo lwemisebenzi yezokuphatha.

Lolu hlelo lubhekele imisebenzi yezokuphatha neminye imisebenzi ebalulekile yoMnyango, futhi lubandakanya yonke imisebenzi yokulawula nokusebenza eHhovisi likaMgcinimafa wesiFundazwe. Lihlanganise amaHhovisi abaPhathiswa, iNhloko yoMnyango, isiKhulu esiPhezulu kwezeziMali nemiSebenzi yoMnyango, okubandakanya uphiko olubhekele iziNdaba zabasebenzi.

3.1.1 Uhlelo i-Operation Sukuma Sakhe (OSS)

IKhabhinethi yesiFundazwe isungule futhi yaqalisa uhlelo i-Operation Sukuma Sakhe (OSS) ukuze kulekelelwe izihlelo ezikhona zeminyango kahulumeni zokuhlinzeka izidingo. Lokhu empeleni kuhlose ukuphucula ukuhlinzekwa kwezidingo futhi kuqede izihibe ezivimbela abantu nemiphakathi ekutheni bakwazi ukuthola izidingo kuhulumeni. Lokhu, kulekelela imizamo kahulumeni yokulwa nobubha nokubhekana

nezingqinamba ezejwayelekile emphakathini. Lolu wuhlelo lokungenelela oluvunywe kuzwelonke kanye nasezingeni lomhlaba.

Uhlaka lokusebenza lwe-OSS lubandakanya abaPhathiswa okuyizona izinhloko zezifunda ngokwepolitiki kanti nezinhlango zeminyango nazo zitshalwa ezifundeni ezahlukene. UMphathiswa utshalwa esiFundeni saseMgungundlovu kuthi iNhlango yoMnyango itshalwe kuMasipala weTheku.

IKhabhinethi yesifundazwe isingatha imicimbi ye-OSS nyanga zonke. Le micimbi ididiyelwa yiHhovisi likaNdunankulu ngokushintshashintsha zonke izifunda KwaZulu-Natal.

3.1.2 Uhlelo lokuFinyelela nokuSiza eMphakathini

UMthethosisekelo waseNingizimu Afrika uyalela amaHhovisi abaGcinimafa beziFundazwe ukuba ahlele izingxoxo phakathi kukahulumeni nomphakathi ngendaba yokuhlinzekwa kwezidingo. IHhovisi loMgcinimafa wesiFundazwe likhipha ulwazi liphinde lihlangele nomphakathi nabanye abathintekayo ukuqinisekisa ukuthi kuba nohlelo lokwabelana ngemibono nxazonke.

Lo mnyango usuqale indlela ehlukile yokusingatha uhlelo lokuya emphakathini. Esikhundleni sokuba kube nemicimbi emikhulu egcwala izinkumbi, umnyango ukhetha bese uxhasa izinhlangano ezingenzi nzuzo ezisebenza emphakathini ukuze kuthuthukiswe futhi kuphuculwe izimpilo zabantu. Isiqubulo seHhovisi likaMgcinimafa wesiFundazwe ukwenza umehluko nokulekelela ekubhekaneni nezidingo zabantu. Lo mnyango unabasebenzi abanothando futhi unophiko lwezokuxhumana olusebenzayo ukubhekana nalo msebenzi.

UMphathiswa neNhlango yoMnyango, banamaphrojekthi okwelula isandla emphakathi abandakanya:

- Ukunikelwa komfaniswano wesikole, amakhompyutha asebenzile nezinye izinsiza kubafundi abahlwempu abahlonzwa ngesikhathi kunezigcawu zama-war rooms,
- Ukulekelela izindawo ezihlaselwe yisomiso ngokuhlinzeka amathangi amanzi ezikoleni. (Lokhu kubandakanya ukufakwa kwamathangi amanzi nokusabalalisa amanzi kanjalo nokumbiwa kwezigwedlo nokufakwa kogadasi),

- Ukuzama uxhaso lokwakha nokulungisa ingqalasizinda yezikole,
- Ukusebenzisana noMnyango wezokuThuthukiswa koMphakathi ukulekelela izinhlangano ezingenzinzuzo ezisemthethweni, kugxilwa kakhulu ezinganeni eziyizintandane nabadala.

Kulo nyaka, umnyango uzogxila ekukhulumisaneni nochwepheshe nentsha nabasha abasemikhakheni ephezulu kwezobuchwepheshe.

Ngophiko lakwa-Inter-governmental Relations (IGR), iHhovisi leNhloko yoMnyango liyaqhubeka nokuhola izinhlelo zeHhovisi likaMgcinimafa kuZwelonke nezeSETA yoHulumeni baseKhaya okuhloswe ngazo ukuhlangabezana namazinga emukelekile olwazi lokuphathwa kwezimali komasipala esifundazweni okuyilawa:

i. UMthethonqubo Wekhono Elamukelekile

Lolu hlelo lwakhelwe ukufezekisa izidingo zeziGaba 83, 107 no 119 zeMFMA phakathi kokunye ezithi, ***“izikhulu eziphezulu, izimenenja emazingeni aphezulu, izikhulu eziphethe izimali nabanye abasebenzi bezezimali kumasipala kumele bahlangabezane namazinga emukelekile olwazi lokuphathwa kwezimali abekiwe.”***

Uhlelo luhlose ukuphucula ikhono lokuphathwa kwezimali emazingeni eziMenenja zoMasipala, iziKhulu eziPhezulu ekuPhathweni kweziMali neziMenenja zakwa-Supply Chain ukuze kwandiswe amathuba okutholakala kwemibiko yokucwaningwa kwamabhuku engenagcobho komasipala.

ii. UHlelo lokuQeqeshela ukuPhathwa kweziMali koMasipala

Lolu hlelo kuhloswe ngalo ukuba kuqeqeshwe intsha eqala ukusebenza eqashwe ezinhlangeni ezifana nezolokuhlela nokulawula ukusebenza, isabelomali kumasipala, ukukhishwa kwamathenda nakwezezimali ukuze bakhulise amakhono abo ukuze bengeze ikhono ekusebenzeni komasipala, futhi benze kube nesizinda lapho kungatholakala khona abantu abanamakhono uma kuvela amathuba okusebenza ngokugcwele komasipala.

Lolu hlelo lukhuluma ngqo nokubhekana nokushoda kwabantu abanekhono nabanesipiliyoni okuyinkinga ebhekene nomasipala abaningi basemakhaya, okwenza ukuthi izikhala ezibalulekile zigcine

zingagcwalisiwe noma zigcwaliswe ngabantu abangaqeqeshiwe ngokufanele.

iii. Uhlelo Lwentsha

Lolu hlelo luzinze eHhovisi likaNdunankulu kanti luhlangana neHhovisi likaMgcinimafa nge-IGR. Luhlose ukwenza kube nokusebenzisana nokudidiyelwa ndawonye kwezinhlelo zeminyango ukuze kuthuthukiswe intsha esifundazweni ngokuthi kuqinisekise ukuthi intsha iba yingxenye yezinhlelo zikahulumeni eziqhamuka nePhalamende leNtsha nokuqaliswa kwezinqumo zalapho.

Isifundazwe sesiqale uhlelo olubheka nxazonke lweminyango ehlukenefuthi oludidiyelwe oluzobhekana nezidingo ezingokwenhlalo zentsha KwaZulu-Natal. Luyahambisana nohlaka lwenqubomgomo lwesifundazwe nezinhlelo ezilawula uhulumeni nezinhlaka asebenzisana nazo emphakathini ukuze izinhlelo zabo zihambisane nalo. I-IGR iyingxenye yethimba lesifundazwe elididiyela, lihlanganise futhi liqaphe izinhlelo zokungenelela ekuthuthukisweni kwentsha futhi isebenzisana neHhovisi likaNdunankulu ukubika ngenqubekela phambili esifundazweni.

iv. Ukwandisa isizinda samakhono kwezezimali kuHulumeni wesiFundazwe

IHhovisi likaMgcinimafa KwaZulu-Natal lathole imvume yokuqeqesha evela esikhungweni *iSouth African Institute of Chartered Accountants* (SAICA) ngoZibandlela ka 2015. NgoMasingana ka 2019, lo mnyango wemukele abanye abathathu abebezinqeqeshelwa umsebenzi wokubala izimali (*chartered accountants*) okwenze isibalo sabo safinyelela kwabayishumi nanye, njengoba kunabayishiyagalombili abasaqeqeshelwa wona umsebenzi wokubalwa kwezezimali (CA), nabathathu asebephothule ngempumelelo ukuba ngama*Chartered Accountants* aqeqeshwe nguHulumeni okumanje basohlelweni lwangaphakathi lweminyaka emibili lokuzithuthukisa. Loluhlelo ngolokuphendula kwikhwelo likaMengameli lokwandisa amakhono okuphathwa kwezezimali ezweni lonke. Ngalolu hlelo, iHhovisi likaMgcinimafa lizophinde landise amakhono eminyangweni yesifundazwe nakomasipala ukuze bakwazi ukuphatha kahle izimali.

IHhovisi likaMgcinimafa wesiFundazwe litshale izimali esikhwameni somfundaze iThuthuka Busary Fund okuyisikhwama sabafundi ababencishwe amathuba esikhathini esiphambili ezifundweni ezithinta izimali abafuna ukuqhuba izifundo zabo emkhakheni wobu*Chartered Accountant*. Bangu 82 sebebonke abafundi okumanje baxhaswe yilo mnyango. Bonke laba bafundi baqhamuka ezifundeni ezahlukene zomasipala eKZN, kanti kulindeleke ukuba basebenzele isifundazwe uma bephothula izifundo zabo. Yibona abazoqhubekela ohlelweni lokuqeqeshwa olubalulwe ngasenhla.

3.2 UHLELO 2: UKULAWULWA NGENDLELA ENOKONGA KWEZINSIZA – R47.641 MILLION (ISUKA KU R40.657 MILLION NGESABELO SIKA 2018/19)

Ushintsho olukhulu kulesi sabelomali uma kuqhathaniswa nezabelomali zaphambilini wukuthi iHhovisi likaMgcinimafa kuZwelonke labe uR5 million ngonyaka labela amaHhovisi eziFundazwe imali eya ezimpikweni ezibhekele ingqalasizinda. Lesi sabelo sibhekiswe ngqo ukweseka imizamo ekhona yokwandisa ikhono kwezobuchwepheshe emahhovisi abhekene ingqalasizinda ukuze kwenziwe ukuhlinzekwa kwengqalasizinda kusheshe ezifundazweni.

Inhloso enkulu yoHlelo 2 ukulawula kahle nokuqapha isikhwama sesifundazwe nohlelo lokwabiwa kwezimali. Ukuqinisekisa usizo kwezezimali esifundazweni yikhona okubhekwe kakhulu ukuba kufezekiswe ngokuthi kuqashwe ngeso lokhozi ingeniso nezindleko zeminyango ukuze kuqinisekise ukuthi kusetshenziswa izimali ebezihleliwe.

Njengoba ngishilo kwinkulumo yeSabelomali engiyethule mhla ka 9 kuNtulikazi, isibophezelo sethu sokuqinisekisa ukuthi sisebenzisa lesi isabelomali ngendlela enokucophelela nangendlela eyiyo sisamile. Ngenxa yalokho, izinhlelo zokunciphisa izindleko zisalokhu zikhona. Lezi zinhlelo zizosisiza ukuba sikwazi ukugxilisa isabelomali sethu lapho sidingeka khona ngempela ukuze sifeze izidingo ezibalulekile zesifundazwe.

3.2.1 IziMali zoMphakathi

Lolu phiko lulawula izinhlelo zokwabiwa kwezimali. Iqhaza lalo libandakanya imibiko yanyanga zonke neyamakota onyaka esetshenziswa yizinhlelo eziqaphile, njengesishayamthetho noMkhandlu oPhethe wesiFundazwe, ngombono wokuba kuqinisekise ukuthi iKwaZulu-

Natal ayichezuki ezimalini eyabelwe zona. Lo msebenzi wokuqapha wenziwa eminyangweni nasemabhizinisini kahulumeni. Sisazibophezele ukuqinisekisa ukuthi abantu KwaZulu-Natal bathola usizo abaludingayo nolubafanele nokuthi izimali ziyahlangabezana nezidingo eziphambili zesifundazwe.

Njengoba ngishilo, izinhlelo zokunciphisa izindleko ziyaqhubeka futhi kumele zilandelwe yiyona yonke iminyango namabhizinisi kahulumeni, njengoba kusho isekhula yokunciphisa izindleko. Lokhu kwenza umehluko obonakalayo ekongeni izimalini ezisetshenziswa yiminyango ngenhloso yokunciphisa izindleko ezintweni ezithile ukuze kusetshenziswe lezo zimali ezinhlelweni zokuhlinzekwa kwezidingo. Le Ndlela yokuzithiba lapho kusetshenziswa izimali isisizile esikhathini esiphambili kanti izoqhubeka nokusisiza sibhekane nokuncipha kwesabelomali futhi sigxile ezinhlelweni zethu ezibalulekile. Wonke umuntu kulo hulumeni wesifundazwe kumele akwenze umthwalo wakhe ukunciphisa izindleko ngoba lokhu akuwona nje umsebenzi weHhovisi likaMgcinimafa wesiFundazwe kuphela. Sonke kumele sibambe iqhaza.

Uphiko lweziMali zoMphakathi luzoqhubeka nokubonisana neHhovisi likaMgcinimafa kuZwelonke ukuqinisekisa ukuthi isifundazwe sithola ingxenye yaso esifanele ezimalini ezihlanganiswa kuzwelonke futhi lokhu kubandakanya ukubuyekezwa kwendlela okwabiwa ngayo izimali zezifundzwe kanjalo nengxenye etholakalayo.

3.2.2 Uphiko lwezeNgqalasizinda nokuHlaziywa kwezoMnotho

Lolu phiko luhlinzeka umkhombandlela kuyona yonke iminyango eyenza amaphrojekthi engqalasizinda. Lapha sibala umkhombandlela kwezokuhlela, ukwenza isabelomali nokuqalwa kwamasu engqalasizinda. Lolu phiko luphinde lube neThimba lokuHlela iNgqalasizinda elilekelela iminyango, amabhizinisi kahulumeni nomasipala uma sebenza amaphrojekthi engqalasizinda, ikakhulukazi ukukhulula amaphrojekthi engqalasizinda anezingqinamba noma ahamba ngesivini esincane.

I-Estimates of the Provincial Revenue and Expenditure engiyethule ngasekuqaleni kwale nyanga ngesikhathi ngivuselela isabelomali sesifundazwe ibala wonke amaphrojekthi engqalasizinda umnyango ngamunye ozowenza kulo nyaka weMTEF. Lolu shicilelo lubaluleke kakhulu ngoba lungadlala indima ebalulekile ekuqapheni ngendlela mayelana

nokuhlinzekwa kwengqalasizinda esifundazweni sethu. Ingalekelela amaLungu ale Ndlu ukuthi akwazi ukudlala indima yawo yokuqapha ezingeni lamaphrojekthi.

3.3 UHLELO 3: UKUPHATHWA KWEZIMALI – R223.541 MILLION (ISUKA KU R209.602 MILLION NGO 2018/19)

3.3.1 UHlelo lwe-Accounting Services

Ukwenyuka kwalesi sabelomali salolu hlelo kungenxa yoxhasomali luka R10 million olwabelwe uhlelo oluncane lwaka-*Accounting Services* ukuze baqhubeke nokulekelela omasipala namabhizinisi kamasipala mayelana nokuqalisa iMithethonqubo yoMasipala ngoMsebenzi wokuBalwa kweziMali (iMunicipal Regulations on Standard Chart of Accounts – mSCOA).

Inhloso enkulu yalolu hlelo ukuqinisekisa ukuthi zonke izinhlelo zokuphathwa kwezimali nezinhlalo ezisetshenziswa esifundazweni ziholela ekutheni kube nokuphatha ngendlela enokonga nokunemiphumela emihle ekuphathweni ngendlela izinsizakusebenza zesifundazwe. Ukukhishwa nokuqapha ukusebenza kwemiyalelo nemigomo namazinga kubalulekile uma kuzoba nohlelo olusobala nolusebenzayo lokuphathwa kwezimali.

Lolu phiko luzoqhubeka nokuqeqesha nokulekelela omasipala namabhizinisi omasipala ukuze bkwazi ukukhipha izitatimende zezimali ezethembekile futhi kuhlelwe izimali ngendlela ehambisanayo nezidingo zoMthethonqubo we-mSCOA.

UPhiko luphinde lweseke imiNyango namaBhizinisi kaHulumeni ngokuphathwa kwezimali ukuze kuhlelwe ukubhalwa kwezitatimende zezimali, ukulawula izikweletu zikahulumeni, ukukhokha ngesikhathi nokuphatha impahla. Ithimba elibhekele “uhlelo lokukhokha ngesikhathi” likhona ukuze libhekane ngqo nezikhalazo zokungakhokhelwa ngesikhathi noma sekwedlule isikhathi ama-*invoice* abahlineka bemisebeni nokubika eHhovisi likaMgcinimafa kuZwelonke ngokulandelwa koMyalelo No. 34. Lolu phiko lweseka amaSMME ikakhulukazi ukuxazulula izindaba zokungakhokhelwa ngezikhathi ezahlukene.

3.3.2 UHlelo oluNcane lokweSeka neziNhlelo eziXhumanayo zeziMali

Lolu hlelo luyaqhubeka nokweseka izinhlelo zezimali esifundazweni. Lolu hlelo oluncane luyaqhubeka nokuhlinzeka ukuvikeleka okudingekayo ohlelweni lweBAS nolwePersal ngaleyo ndlela lusiza ukuthi isifundazwe singalahlekelwayimali. Ngokusetshenziswa kohlelo lwezithupha iBiometric Access Control System (BACS), akukho obugebengu bokukhwabanisa osebuke babikwa kwabantu abangaziwa.

3.3.3 UkuNciphisa kokuSetshenziswa kweMali okungagunyaziwe

Amathimba alawula izinhlelo ezincane okuyilezi, **Accounting Services, Supply Chain Management ne-Norms and Standards**, azothatha izinyathelo ezingqala ukuqinisekisa ukuthi kunabokungenelela kusenesikhathi ukuze kugwenywe imiphumela engemihle yokucwaningwa kwamabhuku, ukusebenza budlabha kwezimali nokumoseka kwezimali.

Lezizimpikozibalulekile ekuqalisweni koMyalelo No. 2 ka 2019/20 weHhovisi likaMgcinimafa kuZwelonke ophinde ukhalime ukusebenza kwezimali okungagunyaziwe ezikhungweni ezingaphansi kwe PFMA ngokomthetho olawula ukusetshenziswa kwezimali okungagunyaziwe. Ngenxa yalokhu, zonke izicelo zokuvunyelwa ukusebenzisa izimali ezingagunyaziwe eminyangweni kahulumeni wesifundazwe nasemabhizinisini kahulumeni okusoHlwini 3C no 3D kwiPFMA kumele kulethwe eHhovisi likaMgcinimafa wesiFundazwe elithintekayo ukuze likubheke. Ukuhlela mayelana nokuqaliswa koMkhombandlela wokugunyazwa kokusetshenziswa kwezimali okungahleliwe sekungasemaphethelweni ukuze kuzoqinisekiswa ukuthi zonke izicelo zokugunyazwa ezenziwa yiminyango, ziyacutshungulwa engakedluli umhla ka 31 kuNdasa 2020.

Uphiko lakwa-**Norms and Standards** lubhekele ukwakha, ukuhlela nokuqalisa, kanjalo nokuqapha ukulandelwa kwemigomo namazinga okusetshenziswa kwezimali eminyangweni yesifundazwe, komasipala nasemabhizinisini ukuze kuphathwe kahle izimali.

Lolu Phiko luzoqhubeka nokweseka iminyango, omasipala namabhizinisi ukugxila ekubuyekezeni nasekwakhiweni kwezinqubomgomo ebalulekile yezimali, imiyalelo yokusebenza namazinga nemikhombandlela yamazinga ajwayelekile okusebenza. Uphiko luzozama ukugxila kakhulu emsebenzini

walo wokuQala nokuhlola ukulandelwa kwemigomo yokuphathwa kwezimali futhi luqhamuke nezixazululo, uma zidingeka.

Uhlaka loMhlahlandlela wokuDluliselwa kwaMandla lwemiNyango luyabuyezwa ukuqinisekisa ukuthi ukudluliselwa kwamandla kuyasayinelwa emazingeni afanele ukuze kube nemiphumela edingekayo, ngesikhathi esifanayo kugxilwa kakhulu ekuhlinzekweni kwezidingo ngendlela esheshayo nefanele. Ukubuyezwa nezichibiyelo, uma kudingeka zizophothulwa ngoMandulo 2019.

Ukuthola kwethu umbiko ongenagcobho wokucwaningwa kwamabhuku okwehlandla lika 9 kuVoti 6 nasesiKhwameni seziMali zesiFundazwe kungubufakazi bokuzibophezela kwethu nasekulandeleni kwethu imithetho yokuphathwa kwezimali.

3.3.4 Uphiko lakwaSCM lesiFundazwe

Uphiko lakwaSCM lesiFundazwe lusabheka ezinye izinhlelo zemigomo ezingasetshenziswa ukuze kuqhutshelwe phambili izinhlelo zokuletha izinguquko eziqala kwezomnotho (Radical Economic Transformation). IHhovisi likaMgcinimafa esifundazweni lumatasa nokusungula uphiko olukhethekile oluzoqinisekisa ukuthi kuqala ukusebeza iMithethonqubo yokuHlomulisa kwezomnotho labo ababencishwe amathuba ebizwa nge Preferential Procurement Regulations of 2017. Uhlelo lokuqasha seliqalile. Lolu phiko luhlose ukuhlolisisa imigomo yamathenda angaphezu kwezigidi eziyisihlanu kuyona yonke iminyango ukuba aqinisekise ukuthi eseka uhlelo lweziNguquko eziNqala kwezoMnotho esiFundazweni.

Lolu phiko seluphohule ngempumelelo uhlelo lokuqalisa ukulawulwa kwezinkontileka kubo bonke omasipala kanti njengamanje luqaphe inqubekelaphambili mayelana nokwesekwa msebenzi osuqaliwe. Kuyaqhubeka ukuqapha umsebenzi osuqaliwe kanti kumanje bangu 60% omasipala asebenamarejista axilongiwe ezinkontileka. Lolu Phiko lukhuthaza ukuba kubonakale ukulandelwa kwemithetho ngenhloso yokunciphisa izigamelo zokusebenza kwezimali okungahleliwe eminyangweni nakomasipala. Siqale uhlelo lokuqhuba ukulawulwa kwezinkontikeka eminyangweni yesifundazwe.

IHhovisi likaMgcinimafa wesiFundazwe lizoqhubela nokuhlinzeka ukwesekwa mayelana neSCM eminyangweni, komasipa, nasemabhizinisini

kahulumeni okutholakala ukuthi asenkingeni ngendaba yokukhishwa kwamathenda. Ukwesekwa kuhlinzekwa ngokuthi kuthunywe abantu ezikhungweni ezahlukene abazokwazi ukufike bahlonze amagebe nobuthaka obukhona ekukhishweni kwamathenda bese kuqalwa izinhlelo ezifanele zeSCM zokulungisa isimo.

3.3.5 Uphiko lokuBambisana kwaHulumeni neziNkampani eziziMele

Uphiko lokuBambisana kwaHulumeni neziNkampani eziziMele luzoqhubeka nokulekelela iminyango nomasipala ukuthi bakwazi ukuba namakhono okusingatha amaprojekthi alolu bambiswano.

Kokubili ukubuyekezwa kwenkontileka nohlelo lokukhululwa mayelana nenkontileka ehlanganyelwe yaseNkosi Albert Luthuli Central Hospital (IALCH) sekuphothuliwe, kanti uphiko kumanje lusiza uMnyango wezeMpilo ukuba uqalise izincomo zemibiko yomibili.

Lolu phiko futhi luyalekelela Ilembe Water Concession. IBorough of Dolphin Coast yangena esivumelwaneni neSiza Water Proprietary Limited (Siza Water) ukuze kuphakelwe amanzi nokuthuthwa kwendle endaweni ehlonziwe kumasipala. Lolu phiko luzocubungula isivumelwano sale phrojekthi bese luyaluleka ngayo.

Uphiko lwe PPP luzoluleka uMasipala waseMhlathuze ngohlelo oluhlongozwa yiMasipala lokuhlaza amanzi ukuze akwazi ukuphinde asetshenziswe.

3.4 UHLELO 4: ABACWANINGIMABHUKU BANGAPHAKATHI – R166.345 MILLION (ISUKA KU R144.555 MILLION NGO 2018/19)

Ukwenyuka kwezimali kuka 15% kudalwe wukulungiswa kwesimo sokungaxhaswa ngokwenele kophiko lwabacwaningimabhuku bangaphakathi esifundazweni. Ukwenyuswa kwemali bekuncike ocwaningweni lwesu eligunyaziwe leminyaka emithathu lokusebenza kophiko lwabacwaningimabhuku bangaphakathi esifundazweni.

3.4.1 Igatsha lakwa-Assurance Services

UPhiko lunesibalo esikhulu samabhuku okumele acwaningwe ngokwesu lokusebenzalaminyakayonkelesiFundazwe. Lawamabhuku acwaningwayo kubhekwa ngokwengcuphe yalowo nalowo mnyango; ukuthi izindlela

zokulawula ngabe zihloliwe zakhombisa ukuthi zingakwazi ukuqinisekisa iziphathimandla ukuthi ingcuphe igwenyiwe. Ngenxa yokuthi ukuma kophiko akukakabuyekizwa, kunokushoda okukhulu kwabasebenzi ophikweni, okuholele ekutheni kuthenjelwe kakhulu ezinkampanini zangaphandle, okufaka ingcindezi ezimweni sezimali esivele sintenga kulolu phiko.

UPhiko lukwazile ukwenza amaprojekthi okucwaninga amabhuku angu 180 onyakeni wezimali ka 2018/19. Ngonyaka wezimali ka 2019/20 kuzogxilwa ekutheni kwenziwe ucwaningo lwamabhuku emisebenzini ethile ehlonziwe yeminyango kanjalo nokubhekwa kwamabhuki athinta izimali okubalwa ukuphuma nokungena kwazo, ukubheka impahla, ukucwaninga ngokukhishwa kwamathenda, ukulawulwa kwezinkontileka, ulwazi ngamazinga okusebenza nokubhekwa kokuqashwa kwabasebenzi.

Ngaphezu kwalokho, kwenziwe ucwaningo olukhethekile lwe-IT, kwabhekwa izinga lokusebenza nokusebenza kwezimali kuyo yonke iminyango esifundazweni ngokuhambisana nesu lokusebenza laminyaka yonke eligunyazwe yikomidi lokucwaningwa kwamabhuku nokubheka ingcuphe lesifundazwe futhi oluhambisanayo nesabelomali esikhona.

UPhiko luphinde lwenza eminye imisebenzi yokulandelela mayelana nokucwaningwa kwamabhuku ukuze kubonakale ukuthi ngabe iminyango iyakwenza yini okunconywe nokuvunyelwene ngakho emibikweni yabacwaningimabhuku bangaphakathi neyomcwaningimabhuku-jikelele. Siyaqhubeka nokunxusa iziphathimandla ukuba bazihloniphe izincomo ezivela kule mibiko yokucwaningwa kwamabhuku futhi bazifezekise ukuze kube noshintsho kwimiphumela yokucwaningwa kwamabhuku.

Ukubekwa komsebenzi wokucwaningwa kwamabhuku kwangaphakathi akukakaxazululwa. Umbiko walolu cwaningo usuphothuliwe kanti kulindeleke isinqumo kulo nyaka wezimali ngalolu daba.

3.4.2 Uphiko lwe-Risk and Advisory Services

I-Risk and Advisory Services uPhiko lakwa-Internal Audit. Lolu phiko lujutshwe ukuba lweseke iminyango yesifundazwe, amabhizinisi kahulumeni nomasipala mayelana nokulawula ingcuphe nokunye okuphathelene nokuphatha uhulumeni.

Uhlaka lesiFundazwe lokuLawula iNgcuphe luzokhishelwa yonke iminyango yesifundazwe ngonyaka wezimali ka 2019/20. Lokhu kuzosiza uMnyango ekutheni uhlele uHlelo lokuLawula uLwazi ngeNgcuphe lweCURA ukuze luhambisane noHlaka lesiFundazwe lokuLawula iNgcuphe, futhi uhlelo lwenabele kuyona yonke iminyango yesifundazwe.

Ngonyaka wezimali odlule (2018/19), iminyango yesifundazwe yakhombisa amazinga aphantsi okuvuthwa mayelana nokulawulwa kwengcupe nezindlela zangaphakathi zokulawula ingcuphe. Ngakho-ke uHlaka lwesiFundazwe olubuyekeziwe lokuLawula iNgcuphe kuhloswe ngalo ukuba kukhuliswe amazinga okuvuthwa eminyangweni yesifundazwe mayelana nokulawula ingcuphe nezindlela zokulawula zangaphakathi. Uphiko luzoqhubeka nokulekelela iminyango ngomsebenzi wongoti wokuhlola ingcuphe okubandakanya ukuhlola ukulandelwa kwemigomo yezempilo nokuphepha emsebenzini kuyona yonke iminyango.

Ngophiko lwethu lwakaRisk and Advisory, iHhovisi likaMgcinimafa esiFundazweni luzophinde lusize laba omasipala ababhekene nezinselelo zokungakwazi ukuphatha kahle ukusebenza, okubalwa ukuvuthwa mayelana nokulawula ingcuphe njengoba kungasho imiphumela yombiko woMcwaningimabhuku-Jikelele.

3.4.3 Uphiko lwezoPhenyo

Siwuphiko sithole izicelo ezingamakhulu amane neshumi nesikhombisa (417) zokuba siphanye kusukela ngoZibandlela 2009 kuya kuNdasa 2019 ezivela eminyangweni kahulumeni, amabhizinisi kahulumeni nakomasipala. Inani esiliphenyayo elibandakanyeka enkokhlakalweni nasekukhwabaniseni lilinganiselwa ku-R9.023 billion, kusukela ngoZibandlela ka 2009 kuza manje.

Cishe ezingu 80% kwizicelo zophenyo ezitholakele ziphenyiwe kwaqedwa. Lapho bekumele kwenziwe uphenyo lobugebengu sidlulisele ezinhlakeni zomthetho ukuze ziphinde ziphenye. Izicelo ezingu 20% ezisele yizinto ezithinta inkohlakalo nokukhwabanisa kumanje simatasa nazo.

Iningi lezinsolo esizitholile saziphenya zibucayi futhi zijulile. Lolu phenyo luyabiza futhi seludale ukuba uphiko lube nengcindezi yezezimali. Uphiko ngakho-ke selucele izikhungo zohulumeni basekhaya namabhizinisi kahulumeni ukuba axhase uphenyo olwenziwa kubona, izigcawu zamacala

nokupheywa kobugebengu. UMgcinimafa wesiFundazwe uyosiza lapho kunesidingo khona uma engakwazi, kodwa uzogxilala kakhulu ezicelweni zophenyo ezivela eminyangweni yesifundazwe. Uphiko luphinde lwacela iminyango yesifundazwe ukuba nayo ixhase ngezimali izigcawu zamacala ayo futhi ngezinye izikhathi ixhase nokuphenywa kwamacala obugebengu.

Uphiko lokuphenywa kwamacala luzibophezeke ukulwa nenkohlakalo nokukhwabanisa futhi selusize izinhloko zomthetho ezifana ne-Anti-Corruption Task Team (ACTT), iNational Prosecuting Authority (NPA), iSouth African Police Services (SAPS), SCCU ne-Asset Forfeiture Unit ezindabeni ezidinga ukuphenywa kwamacala obugebengu. Uphiko luphinde lwasiza iziphathimandla eminyangweni ukuhlenganisa izincwadi ezifungelwe ukuze babhalise amacala obugebengu futhi luxhumana njalo nabaphenyi kanjalo nabashushisi ukuze kuzonquywe ngesimo samacala afakiwe ukuthi ngabe lukhona yini olunye usizo oludingekayo.

Uphiko lunikwe ijoka lokuqapha ukwenziwa kwezincwadi eziqukethwe embikweni wokugcina wophenyo wezikhulu zezimali ngokwahlukana kuyona yonke iminyango mayelana namacala obugebengu, ukuqondiswa izigwegwe nokumangalelana. Ngomsebenzi owenziwe ngonyaka wezimali ka 2018/19, kwatholakala umyalelo wenkantolo wokuba kubuyiswe imali engango R543 million.

3.5 UHLELO 5: UKULAWULWA KWEZIMALI ZOMASIPALA – R63.893 MILLION (ISUKA KU R63.709 MILLION NGO 2018/19)

Uhlelo 5 lusungulwe ngo 2018/19 ngokuhambisana nohlaka olusha lwawo wonke amahhovisi abaNgcinimafa olugunyazwe yiBudget Council Lekgotla ngomhla ka 8 kuLwezi 2014. Uhlelo olusha luhlinzekela uhlaka oluhlangene mayelana noPhiko lokuPhathwa kweziMali zoMasipala elizogxila kakhulu kulabo masipala abahlonziwe. Ukukhula kancane kwesabelomali salolu hlelo sesisonke ngo 2019/20 kungenxa yokuthi lolu hlelo luhlelwa ukwenziwa kanyekanye ukuze kubhekwane nezingqinamba oHlelo 3 ukuze kusizwe omasipala namabhizinisi omasipala ukuba asebenze ngendlela ehambianayo nemithethonqubo ye-mSCOA.

Uhlelo lokuPhathwa kweziMali koMasipala luhlukene amagatsha amane, okuwuHlelo lokweSeka, iSabelomali sikaMasipala, ukuBalwa kweziMali nokuBika

kuMasipala noHlelo lokweSeka oMasipala. Igatsha lesihlanu, lokuLawula iNgenisomali neziKweleti lizoqala ukusebenza ngo 2020/2021 esikhathini seMTEF. Uphiko luzosiza futhi lunike omasipala abahlonziwe izeluleko ngokusingatha ingenisomali nezikweleti.

IHhovisi likaMgcinimafa lesiFundazwe lizothuthukisa amakhono ukuze kubhekwane namaphuzu ayisithupha abalulekile ahlonzwe ezingeni likazwelonke okubalwa kuwo.

- ISabelomali nokuBika
- UkuPhathwa kweMpahla
- UkweSeka imiSebenzi yokuCwaninga amabhuku
- UkweSeka i-mSCOA
- UkuLawula iNgenisomali
- UkuLawula ukuKhishwa kwaMathenda

UPhiko leSabelomali soMasipala luzoqhubeka nokuhlinzeka ngolwezokwesekwa kulabo masipala abathintekayo esifundazweni ukulungiselela izabelomali zabo zeminyaka ehlukeneyo, okubandakanya izabelomali zokuchibiyela, ukuqapha imiphumela yalezo zabelomali kanjalo nokuqapha ukuhambisana nemithetho esebenzayo.

Uphiko lwezokuBika luzohlinzeka omasipala abathintekayo ngokwesekwa ekuPhathweni kweziMali, ukuLawula iMpahla ne-mSCOA. Le misebenzi izofakwa kancane kancane esikhathini seMTEF kuze kube kutholakala amakhono adingekayo ngaphakathi.

Uhlelo lokweSeka oMasipala (MSP) luhlose ukuhlinzeka omasipala ngokwesekwa ngongoti bese kwelekelelwa omasipala ukuthi bathole izindlela zokuphucula ukuhlinzekwa kwezidingo. IMSP iphinde isize omasipala ukuba balandele imithetho ekhona ngesikhathi esifanayo bethuthukisa amakhono ngesikhathi besathola usizo. Usizo lubandakanya izinto usizo ekuqoqeni intela kanjalo nokulawula izibonelelo.

Uhlelo lokuPhathwa kweziMali zoMasipala luzibophezele ukusiza omasipala benze ngcono ukuphathwa kwezimali zabo kanjalo nohlelo lokubika. Okuqaphelekayo, wukuthi impumelelo nozinzo ezinhlelweni zokweseka omasipala kungabonakala kuphela uma abasebenzi nosopolitiki kulabo masipala abathintekayo bezibophezela. Omasipala kudingeka bakubeke ezandleni zabo ukweseka izinhlelo

zokungenelela futhi baqinisekise ukuthi bayawakha amakhono ngaphakathi ukuze zibe ngcono izinhlelo zabo zokuphatha izimali, ngaleyo ndlela kuthuthuke ukuhlinzekwa kwezidingo.

4. ISIPHETHO

Abantu baKwaZulu-Natal basethembe ukuba sibaphathele izimali zomphakathi ngethemba lokuthi sizoziphatha kahle lezi zimali futhi siqinisekise ukuthi sizisebenzisa lapho kudingeke khona ngempela – okungukuphucula izimpilo zabantu abahlwempu ngesikhathi esifanayo kukhuliswa khona umnotho ngendlela enozinzo nangokubhekelela ukulingana kwabantu bamazinga ahlukene.

Sizokwenza okusemandleni ukuhlangabezana nalokho abakulindele kithi.

Kunesisho sesintu esithi: ***“Awusini uphetho ubhaskidi wamaqanda”***. Njengomnyango okuyiwona oqaphe ukusebenza kwezimali zesifundazwe sifunda okukhulu kulesi sisho. Kepha asikwazi ukuba novalo, sime singenzi lutho. Sizozhubekela phambili ngokukhulu ukuzethemba nangokuqikelela.

Mangithathe leli thuba ngiphinde ngibonge kakhulu kwiNhloko yoMnyango wami nabo bonke abasebenzi eMnyangweni wami, ngomsebenzi wabo wonke oncomekayo nangokuzinikela kwabo okungeqhathaniswe.

Ngiyethemba ngingathembela kuwona wonke amaLungu aHloniphekile akule Ndlu ukweseka isabelomali sonyaka wezimali ka 2019/20 sesamba sikaR721.629 million seVoti 6, ngokuzwa izinhlelo zethu nesihlose ukuba kufezwe yiHhovisi likaMgcinimafa wesiFundazwe osekushiwo kulo mbiko.

Njengamanje kuyintokozo kimina ukunethulela lesi sabelomali ukuze nisamukele.

Ngiyabonga.

